



*Jumat, 18 Maret 2022*  
**Ogen: Keluaren 32:7-10**



**Nadingken Dalam Tuhan**



**L**a lit sabarna, mekeng dingen rukur alu la ngerehken kiniulin. Bage me rusur ituriken kerna kecibal bangsa Israel bas Pustaka. Ogenta wari enda e me kerna Musa i deleng Sinai guna ngaloken perintah Dibata. Tapi erkiteken ndekahsa akap bangsa Israel e maka turah perukuren si la mehuli jadi man Musa. Erdandanken si e i ulung-ulungna Harun guna erbahan sada patung emas guna jadi sembah-sembahen (dibatana). Ersada arihna kerina erbahanca, kenca enggo dung patung emas e, imomoken maka wari pe pagi ibahan me penembahen nandangi patung e. Idah Dibata si e kerina e maka isuruhna Musa mulihken ku bangsa e. Bangsa e nadingken dalam si enggo ipedahken Dibata. La banci erbahan patung entah pe sembah-sembahen, sabap Dibata e percemburu. Perukuren bangsa Israel, maka patung si ibahanna e me dibata si maba ia ndarat i Mesir nari. Si e peturah rawa Dibata, nembah ateNa pe e maka ikernepena me ateNa erkiteken bangsa e tuhu-tuhu mekeng. Musa me isuruh guna maba berita e man bangsa Israel. Kejadin e tuhu-tuhu encidahken bangsa enda la megenggeng nimai paksana seh Musa i je.

Mother Theresia ngatakan maka *"tanpa kesabaran kita akan belajar lebih sedikit dalam hidup, kita akan melihat lebih sedikit, kita akan merasa kurang dan kita akan mendengar lebih sedikit."* Guna banci sabar perlu latihan secara terus menerus sabap kalak si sabar e me kalak si ngasup nahan sura-sura daging, ertahan bas situasi sulit janah la mejungut. Ngasup mengendalikan diri ncidahken kinipaguhen kalak e. Sekalak si reh sabarna bas kegeluhen e me kalak si reh paguhna ngalaken erbage-bage persoalen si lit.

Mekatep pe sikataken waktu Tuhan waktu simehulina. Mabai kita segelah tetap erdalan bas dalamNa aminna pe situasi e ngoda kita segelah nadingken IA. Siakui maka si enda labo mesunah bas ndalankenca, tapi kai pe si jadi tetap inget maka i bas paksaNa kari reh nge simehulina.